

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- केंद्री गृह मंत्री अमित शाह होर अज्ज नमीं दिल्ली च जम्मू-कश्मीर ते लद्दाख बारै इक कताब जम्मू-कश्मीर एंड लद्दाख-थ्रू द एजिज़ दा विमोचन करडन।
- 2- दक्खनी कश्मीर दे अवंतीपोरा च पुलसै जैश ए मोहम्मद आतंकी संगठन लेई कम्म करने आहले 4 जनें गी गिरफ्तार करी लैता ऐ।
- 3- जिला पुलस अवंतीपोरा मूजब इस सरबंथै च एफ.आई.आर नंबर 134/2024 तैहत मामला दर्ज करियै अगगे दी पुच्छ गिच्छ शुरू करी दिती गेदी ऐ।
- 4 डोडा जिले दे भद्रवाह कस्बे च इक होटल च त्रुं जनें दी संदिग्ध मौत, मामले दी जांच जारी।

<><><><><><>

Amit Shah Book

केंद्री गृह मंत्री अमित शाह होर अज्ज नमीं दिल्ली च कश्मीर ते लद्दाख बारै इक कताब दे विमोचन आहले कार्यक्रमै च मुख परौहने दे तौर पर शामिल होडन। केंद्री शिक्षा मंत्री धर्मेन्द्र प्रधान बी इस मौके पर उत्थे मजूद रौहडन। कार्यक्रम च केई मन्ने-परमन्ने दे लखारी, शिक्षाविद, मंत्रालय दे अधिकारी ते होर दुए गणमान्य परौहने बी शामिल होडन। 'जम्मू-कश्मीर एंड लद्दाख : थ्रू द एजिज़' कताब च जम्मू-कश्मीर ते लद्दाख दे त्रै जहार ब' रें दा इतिहास

पेश कीता गेआ ऐ। एह् कताब नेशनल बुक ट्रस्ट ते भारती ऐतिहासिक अनुसंधान परिषद दे सैहयोग कन्नै हिन्दी ते अंग्रेजी दौने भाशाएं च प्रकाशित कीती गई ऐ।

<><><><><><>

Jaish Associate Arrested

पुलसै दक्खनी कश्मीर दे अवंतीपोरा च जैश-ए-मोहम्मद आतंकी संगठन लेई कम्म करने आले 4 जनें गी गिरफ्तार करी लैता ऐ। पुलस दा आखना ऐ जे गिरफ्तार कीते गेदे इनें लोकें दी पंछान त्राल पैयन दे रौहने आहले मुदसिर अहमद नाइय वल्द फारूक अहमद नायक, कुचमुला दे वसनीक उमर नजीर शेख वल्द नजीर अहमद शेख, त्राल पैयन दे गै इनायत फिरदौस राथर वल्द फिरदौस अहमद राथर ते कौंसर बल त्राल दे बसनीक सलमान नजीर लोन वल्द नजीर अहमद लोन दे रूपै च कीती गई ऐ। उंदे कब्जे शा किश ऐतराजजोग सामग्री बी बरामद कीती गई ऐ। पुलसै दस्सेआ ऐ जे एह् चवें जैश-ए-मोहम्मद दे आतंकिएं गी आसरमा देने, सम्यान पुजाने ते असलाह वगैरा इक थाहरै दुई थाहर लेई जाने च मदद करदे हे। जिला पुलस अवंतीपोरा मूजब इस सरबंथै च एफ.आई.आर नंबर 134/2024 तैहत मामला दर्ज करियै अगगे दी पुच्छ-गिच्छ शुरू करी दिती गेदी ऐ।

<><><><><><>

Chief Justice Muskan

केंद्र शासित प्रदेश जम्मू-कश्मीर ते लद्दाख दे बक्ख-बक्ख दिक्खभाल केंद्रें च रौहने आहले बच्चें बेहतर दिक्खभाल ते सुरक्षा यकीनी बनाने दे मकसद कन्नै जम्मू-कश्मीर ते लद्दाख

हाईकोर्ट दे मुख न्याधीश ते जम्मू-कश्मीर कन्नी सेवा प्रादयिकरण दे प्रमुख संरक्षक ताशी रबस्तान होरें कल जम्मू दे छन्नी रामा स्थित बाल निकेतन दा दौरा कीता। दौरें दौरान उनें उत्थे रौहने आहले बच्चें कन्नै गल्लबात कीती ते उनेंगी मठेयाइयां ते तोहफे बी तकसीम कीते। इस गल्लबात दौरान एह जानने च बी मदद थोई जे उत्थे रवा करदे बच्चें गी केहड़ियां-केहड़ियां सुविधां उपलब्ध न ते उनेंगी होर केहड़िउएं चीजें जां सुविधाएं दी लोड़ ऐ। उनें बाल निकेतन दे कर्मचारिएं कन्नै बी गल्लबात कीती ते बच्चें दे पूरे-पराते विकास लेई बेहतर सुविधां ते उंदे नै बेहतर व्यवहार पर बी जोर दिता। उनें बच्चें दा ख्याल रखने ते उनेंगी दिती जा'रदिएं सुविधाएं लेई बाल निकेतन दे प्रबंधें, कर्मचारिएं ते प्रशासन दी सराहना कीती।

<><><><><><>

CS-Yuva Survey

मुख सचिव अटल डुल्लू होरें कल मिशन युवा दी शुरूआत कीती। युवा उद्यमी विकास अभियान सरबन्धी एह मिशन समूचे केंद्र शासित प्रदेश च बेसलाइन सर्वेक्षण पर आधारित ऐ। श्रम ते रोजगार ते योजना विभागें आसेआ सांझे तौरा पर कीते जाने आहले इस सर्वेक्षण दा उद्देश्य मजूदा उद्यमिएं कोला प्रतिक्रिया हासल करना ते लगभग 1 लख 37 जहार संभावित उद्यमिएं दी पंछान करना ऐ। इस मौके अपने संबोधनै च मुख सचिव होरें इस सर्वेक्षण दे महत्वै पर लो पांदे होई आखेआ जे नौजवानें गी उद्यमता ते स्वरोजगार गी अपनी रोजी-रूट्टी ते कम्म रोजगार दे मौके दे रूपै च अपनाना लोड़चदा ते एह सर्वेक्षण उनेंगी इस्सै लेई तैयार करने दे मकसद कन्नै शुरू कीता गेआ ऐ। मुख सचिव होरें सरबन्धित मैहकमें गी आखेआ जे आह इस पूरे अभ्यास दी पूरी बकायदगी कन्नै निगरानी करन तां जे एहदी सटीकता गी यकीनी

बनाया जाई सकै। डुल्लू होरें श्रम ते रोजगार मैहकमें गी बक्ख-बक्ख युनिवर्सिटिं ते राश्ट्रीय संस्थानें दे अध्यापकें कन्नै सरबंधत मैहकमें दे माहिरें दी इक टीम खडेरने दा बी निर्देश दिता ते आखेआ जे एहदे नै सर्वेक्षण दे खीरें च इनें विश्लेषणें गी इक सार्थक दस्तावेज तैयार करने लेई असरदार पैमाने दे रूपै च इस्तेमाल कता जाई सकोग।

<><><><><><>

DC-Jammu Capex Budget

जम्मू दे डिप्टी कमिशनर सचिन कुमार वैश्य होरें कल इक बैठक लाइए जिला कैपेक्स बजट तैहत हत्थै च लैते गेदे कम्में दा जायजा लैता। बैठक च लोक निर्माण मैहकमे, शिक्षा, सेहत ते होरनें मैहकमें तैहत चला'रदे प्रोजैक्टें दी मौजूदा स्थिति दा जायजा लैता गेआ। बैठक दौरान कम्में दी अमलावरी च आवा रदी रूकावटें गी दूर करने ते समें सिर इनेंगी पूरा करने पर चर्चा कीती गई। कम्मै दे म्यार दे महत्व पर जोर पांदे होई उनें अफसरें गी हिदायत कीती जे ओह कम्मै च आवा'रदी रूकावटें गी दूर करन ते प्रोजैक्ट दी अमलावरी दौरान उच्च मानकें गी बनाई रखन तां जे लोकें गी म्यारी सुविधा उपलब्ध होई सकन।

<><><><><><>

DC-Rajouri

राजौरी दे डिप्टी कमिशनर अभिषेक शर्मा होरें बन्ने आहले इलाकें दा व्यापक दौरा लाया ते चला रदे विकास कम्में ते लोकें दिएं समस्याएं ते परेशानिएं दा जायजा लैता। अपने दौरे दौरान उनें बड़े मते महत्व आहले प्रोजैक्टें दा जायजा लैता ते मुकामी लोकें ते सरबन्धी धड़ें कन्नै गल्ल कीती तां जे लोकें तगर बेहतर ढंगै सिर सेवाएं दी पुज्जी यकीनी बनी सकै। डिप्टी कमिशनर

होरें कब्जा रेखा कन्नै लगदे ग्रांs बसाली च हाल च दर्जा बदाए गेदे सरकारी मिडल स्कूल दे विकास कम्में दा निरीक्षण कीता। उनें प्रोजैक्ट गी समेंसिर पूरा करने पर जोर पाया।

<><><><><><>

ते हुन बाकि दिएं खबरें कन्नै श्रुति खजूरिया।

Bhaderwah Mysterious Death

डोडा जिले दे भद्रवाह च जंदी रातीं त्रै जनें संदिग्ध हालात च मरे दे पाए गे। भद्रवाह दे रायल इन नां दे इक गेस्ट हाउस च इंदियां लोथां थोने दे बाद कस्बे च डर त्राह आहला माहौल पैदा होई गेआ। इंदी पंछान जम्मू दे दमाना इलाके दे बसनीक 39 बरे दे मुकेश सिंह वल्द कुलदीप सिंह एल्लै जम्मू दे पुरखू इलाके च रौहने आहले डोडा दे भलेसा इलाके दे बसनीक, 30 बरें दे आशुतोष वल्द दलीप रैणा ते सन्नी चौधरी दे तौर पर कीती गई ऐ। पुलसै दस्सेआ ऐ जे मामले दी जांच चलै करदी ऐ जेदे मुकम्मल होने पर गै पता लगगी सकदा ऐ जे इंदी मौत दी वजह केह ऐ।

<><><><><><>

DC-Udhampur

उधमपुर दिएं डिप्टी कमिशनर सलोनी राय होरें साप्तिहिक ब्लॉक दिस जत्न तैहत सी.एफ.सी कोरडी जगीर थाहर लोकें तगर पुज्ज बनाने आहले कार्यक्रम च शिरकत कीती। इस दौरान डीडीसी मिम्बर राकेश शर्मा, साबका बीडीसी चेयरमैन आरती शर्मा, साबका सरपंचें ते पंचें दे अलावा इलाके दे लोकें हिस्सा लैता ते अपनियां मंगा ते मसले उंदे अग्गे, इंदे च मुख करी कोरडी गी तहसील दा दर्जा देना ते केंद्री विद्यालय कायम करना शामिल हा।

<><><><><><>

Kishtwar Electoral Roll

पंचैत मतदाता सूची 2025 गी सेई चाल्ली ते पूरी पारदर्शिता कन्नै प्रकाशित करने दे मकसद कन्नै मतदाता पंजीकरण अधिकारी इदरीस लोन होरें कल किश्तवाड़ च इक महत्वपूर्ण बैठक लाई। इस बैठक च मुख् करी ध्यान किश्तवाड़, पलमार ते त्रिगाम ब्लाक दी मतदाता सूचिएं दे मसौदे पर दिता गेआ। इस दौरान मुख् ध्यान जायजा लैने, दावें ते ऐतराजें गी हल करने पर दिता गेआ। ई.आर.ओ होरें मतदाता सूचिएं गी तैयार करने आहली प्रक्रिया गी मुकम्मल करने पर जोर पाया।

<><><><><><>

DC-Kishtwar Swacch Bharat

किश्तवाड़ दे डिप्टी कमिशनर राजेश कुमार शवन होरें कल जिले च स्वच्छ भारत मिशन दी अमलावरी दा व्यापक जायजा लैता। उन्नै इस सरबंथै च बक्ख-बक्ख मैहकमें कन्नै बैठक लाई। किश्तवाड़ विकास प्रादयिकरण दे मुख् कार्जकारी अधिकारी, ए.सी.डी ते पीडब्ल्यूडी एग्जीक्यूटिव इंजीनियर होरें गी हिदायत कीती जे ओह भारतीय खाद्य निगम दे गोदामें कश महिलाएं ते मर्दे लेई बक्ख-बक्ख शौचालय, बौहने लेई बेंचस वगैरा लान। डिप्टी कमिशनर होरें कस्बे ते ग्रामीण इलाकें च साफ-सफाई बनाई रक्खने ते इलाके गी प्लास्टिक मुक्त बनाने सरबंथी कार्य योजना पर चर्चा कीती।

<><><><><><>

Weather

मौसम विभाग नै औंदी 3 कोला 6 जनवरी तगर जम्मू-कश्मीर च मौसम दा मिजाज़ बिगड़ने, मैदानी इलाकें च हौली थमां दरम्याने दर्जे दी बरखा बरने ते उप्परले प्हाड़ी इलाकें च बर्फबारी दे असार दस्से न। विभाग मूजब 4 ते 5 जरवरी गी केई उच्चिएं थाहरें पर भारी बर्फबारी होई सकदी ऐ। यात्रिएं, सैलानिएं ते ट्रांसपोर्ट गी जिला प्रशासन ते ट्रैफिक मैहकमे आसेआ दिती गेदी हिदायतें दी पालमा करने लेई आखेआ गेआ ऐ। एह हिदायतां बर्फबारी, जमाई देने आहले तापमान ते बड़ी मती ठंड आहले हालात दे मददेनजर दित्तियां गेइयां न। मैदानी इलाकें सने उच्चिएं धारें पर इस्सलै बड़ी मती ठंड पवा रदी ऐ।

<><><><><><>